

ଏଫସିଏମ୍ ମଣ୍ଡଳୀ ନିକଟକୁ ପାଠଲକ୍ଷ ପତ୍ର ଏଫସିଏମ୍ କୁଲମିତାକି ପାଞ୍ଚୁଲ ରାଢ଼ାମାନି ଆକୁ ମୂଲୁ ହାଡ଼ା

ଏଫସିଏମ୍ କୁଲମିତି ଆକୁ ପାଞ୍ଚୁଲ ରାଢ଼ାମାନେସି, ଜୀସୁ କ୍ରୀସ୍ତ ଜାର୍ନାଆଡ଼ି ୭୦ ବାର୍ଷୀ ତାୟୁ କଲସିୟ କୁଲମିତାକି ରାଡ଼ିତି ବେଲା ରାସ୍ତକି ଆହାମାଚେ । ରାଡ଼ିନାସି ତାନୁଏ ପାଣ୍ଡୁଆହାମାନି ପାଞ୍ଚୁଲ ଇଞ୍ଜିମାନେସି ୧:୧ । କଲସିୟ ଆକୁତା ତାନି ଜହରା ହିଲାଆତି ଜିକେଏ ବୁଦିଗାଟାରି ଏଫସିଏମ୍ ଆକୁ ପାଞ୍ଚୁଲ ରାଢ଼ାମାନେସି ଇଞ୍ଜି ଇନେରି । ଅଡ଼େ ବାରେ କୁଲମିକା ତାକି ଆକୁ ହାସାଲି ରାସ୍ତକି ଆହାଡ଼ୟିନେ । ପାଞ୍ଚୁଲ ଇଦାଆଁ ଜିକେଏ ଝେସାମାନେସି ଇ ଆକୁ ରାଡ଼ିନି ବେଲାତା ଏଝାସି କାୟିଦିତା ମାଚେସି ୩:୧-୪:୧ ଅଡ଼େ ୬:୨୦ । ପାଞ୍ଚୁଲ ତୁକିକଇଁ ଏଫସିଏମ୍ କୁଲମିତା ପାଣ୍ଡାନା ଏଝାଣି କେୟୁତା ଇ ଆକୁ ହାହାମାଚେସି ୬:୨୧-୨୨ ।

ଏଫସିଏମ୍ ଏସିୟା ରାଜିତି ର କାଜା ଗାଡ଼ା ମାଚେ । ଏଫସିଏମ୍ ଗାଡ଼ାତି ଗ୍ରିକ୍ ପେନୁ ଆଚେନି ଅଡ଼େ ଏଦାନି ଦେଝୁଡ଼ି ଝେଜିତାୟି ମାଚେ, କାମା ୯:୨୩-୩୧ । ଏଫସିଏମ୍ କୁଲମି ନକେଏ ବାଡ଼ୁୟୁ ଗାଟାୟି ମାଚେ ତାୟୁ ରିହାଲି ମାଟ୍‌ହେ ଝେ ବଲୁ ୨:୧-୭ ।

ପାଞ୍ଚୁଲ ତାନି ଆଦା ଆକୁତା ମାହାପୁରୁ ଏନିକ୍ ତାନି ଲକୁଣି ଆଡ଼ିଡେସି, ଅଡ଼େ ଏନିକ୍ ଜୀସୁ ତାଣାଟି ପାପୁଟି ଗେଲ୍‌ପିଡେସି ଏଦାଆଁ ଝେସିମାନେସି । ପାଞ୍ଚୁଲ କୁଲମିତି ଆଜା ତଲେ ତୁକ୍‌ହାନା କ୍ରୀସ୍ତ ଏଦାନି ତାୟୁ ଅଡ଼େ କନତି ମୂଲୁ ଝାଲି, କୁଲମି ର ତକ୍ତି ଲେହେଁ କ୍ରୀସ୍ତଏ ତକ୍ତା । ଆକୁତି ତାୟୁ ବାଗାତା ପାଞ୍ଚୁଲ ପଡ଼ଝି ଆନାରାଇଁ କ୍ରୀସ୍ତ ତାଣା ରଣ୍ଡିଏ ଆହାଁ ଆଣ୍ଡାମାନି ଲକୁ ଲେହେଁ ନୀତାଲି ବାଡ଼ିମାଲି ମାନେସି ।

ପତିତା ମାନାୟି

୧. ପାହୁଲ ଜହରା କିହାନା ପୁଣ୍ଡି କିହା କଡିନାୟି । ୧:୧-୨
 ୨. କ୍ରୀସ୍ତ ତଲେ କୁଲମିତି ତୁକ୍ନାୟି । ୧:୩-୩:୨୧
 ୩. କ୍ରୀସ୍ତ ତାଣା ଏନିକ୍ ନୀଡିନାୟି । ୪:୧-୬:୨୦
 ୪. ଜହରା କିହାନା ଆକୁତି ରାପ୍ନାୟି । ୭:୨୧-୨୪

୧ ☆ପାହୁଲ, ମାହାପୁରୁତି ଅଣ୍ଡୁ ତଲେ କ୍ରୀସ୍ତ ଜୀସ୍ତୁତି ପାଣ୍ଡୁଝି ଆହାମାନାତେଏ, ଏପିସିୟତା ମାନି ମାହାପୁରୁ ଲକୁ ଇଞ୍ଜା କ୍ରୀସ୍ତ ଜୀସ୍ତୁ ତାଣା ନାମୁତା ମାନି ଲକୁତାକି ଇ ଆକୁ ରାଡିମାଇ ।

୨ ମା. ଆବା ମାହାପୁରୁ ଇଞ୍ଜା ପ୍ରୁ ଜୀସ୍ତୁ କ୍ରୀସ୍ତ ତାଣାଟି କାର୍ମାମେହନାୟି ଅଡେ ହିଡ଼ି ଜୀସ୍ତୁ ମିଙ୍ଗେତାକି ଆୟାପେ ।

ସୁଦୁଜୀସ୍ତୁତି ବର ପାଣ୍ଡୁନାୟି

୩ ମା. ପ୍ରୁ ଜୀସ୍ତୁ କ୍ରୀସ୍ତୁତି ମାହାପୁରୁ ଅଡେ ଆବାଇଁ ଜହରା ଆପେ । ଏଝାସି କ୍ରୀସ୍ତ ତାଣା ମାଙ୍ଗେ ବାରେ ଜୀସ୍ତୁତି ବର ତଲେ ଲାକପୁରୁ ବର ହୀହାମାଞ୍ଜାନେସି । ୪ ମାର ଏନିକ୍ ମାହାପୁରୁ ନକିତା ସୁଦୁ ଅଡେ ଦହ ହିଲାଆଗାଟାୟି ଆନାୟି ଏଦାଆଁତାକି ଏଝାସି ଦାରତି ଗାଡ଼ି ଆଆ ନକେଏ ତାନି ତାଣା ମାଙ୍ଗେ ଆବାମାଞ୍ଜାତେସି । ୫ ଅଡେ ଏଝାସି ମାଙ୍ଗେ କ୍ରୀସ୍ତ ଜୀସ୍ତୁ ତାଣାଟି ତାଙ୍ଗେତାକି ମୀରକା ମାସ୍କା କିୟାଲି ତାନୁଏ ତଲିଏ ତାରି କିତେସି; ଇଦି ଏଝାଣି ରାହାଁ ଅଡେ ଅଣ୍ଡୁ । ୬ ମାହାପୁରୁତି କାର୍ମାମେହନାଣି ତାକି ଇଞ୍ଜା ତାନି ମୀରଏଣାଇଁ ଉଜେଏ ବେଟାଆନି ଦାନା ଲେହେଁ ବେଟାଆହାମାନାକି, ମାର ମାହାପୁରୁଇଁ ଜହରା କିହିମାନାୟି । ୭ ☆କ୍ରୀସ୍ତ ହାଡି ତାଣାଟି ମାର ଗେଲ୍ପି ଆହାମାନାୟି, ଇତିହ୍ ମା. ବାରେ ପାପୁ ମେଣ୍ଡାମାନେ, ମାହାପୁରୁତି କାର୍ମା ଏଚେକା କାଜାୟି ।

୮ ଏଝାସି ଏ କାର୍ମାମେହନାଣି ବାରେ ବୁଦି ଅଡେ ଅଣ୍ଡୁ ମାଙ୍ଗେ ହାରେକା ହୀହାମାଞ୍ଜାନେସି । ୯ ନକେଏ ଅଣ୍ଡାମାନି ତାନି କାର୍ମାତଲେ ଏଝାସି ମାଙ୍ଗେ ତାନି ଅଣ୍ଡୁ ତଲେ ତରୁମାନି ଅଣ୍ଡୁତି ତସାମାଞ୍ଜାନେସି । ୧୦ ଏନିକ୍ କାଲାତି ତାନି ଅଣ୍ଡୁ ତଲେ ଲାକପୁରୁ

କି ଦାରୁଡ଼ିତା ମାନାଣି ବାରେ ଏଞ୍ଜାସି ତାଙ୍ଗେତାକି କ୍ରୀସ୍ତ ତାଣା ରଣ୍ଡେଏ କିନେସି ।

^{୧୧} ମାରୁ ଜିକେଏ ଏଞ୍ଜାଣି ତାଣା ଅଦିକାରା ଲେହେଁ ଆହାମାନାୟି, ଇତିହାସି ଏମିନି ମାହାପୁରୁ ତାନି ମନତି ଅଣ୍ଡୁ ତଲେ ବାରେ କାତା ତୀରି କିନେସି, ଇଞ୍ଜା ଏଞ୍ଜାସି ତଲିଟିଏ ମନତା ତୀରି କିହାମାଟିଲେହେଁ ମାରୁ ନକେଏ ଆଡ଼ୁଞ୍ଜି ଆଡାୟି ^{୧୨} ମାରୁ ଏନିକି କ୍ରୀସ୍ତ ତାଣା ନକେଏ ବାସୁ କିହା ମାତାୟି, ମାରୁ ବାରେତାୟି ମାହାପୁରୁ ଗାଞ୍ଜୁରମିତି ଜହରା କିନାତାୟି ଆନ ।

^{୧୩} ଏଞ୍ଜାଣି ତାଣାଟି ମୀରୁ ଜିକେଏ ସାତା ବଲୁ ଇତିହାସି ମିଙ୍ଗେ ଗେଲପାନି ନେହା କାରୁ ଖେଞ୍ଜାନା ନାମାହା ଆଞ୍ଜାମାନି ସୁଦୁଜୀଞ୍ଜୁ ତଲେ ବୁଚୁ ମୁଦୁଆହାମାଞ୍ଜେରି; ^{୧୪} ମାହାପୁରୁ ତାନି ଲକୁତାକି ଏନାଆଁ ହୀହାଲି ଆଞ୍ଜାମାନେସି ଏ ବାରେ ମାରୁ ବେଟାଆନାୟି ସୁଦୁଜୀଞ୍ଜୁ ତାନି ବାୟିଦା ଲେହେଁ । ମାହାପୁରୁ ତାନି ଲକୁତାକି ଗେଲପି ଆନାଣି ହୀନେସି ଇ ବାରେତାକି ମାହାପୁରୁଟି ଗାଞ୍ଜୁରମି କିନ ।

ପାଞ୍ଜୁଲତି ପ୍ରାତାନା

^{୧୫} ଇଦାଆଁତାକି, ପ୍ରୁ ଜୀସୁ ତାଣା ମୀ ନାମୁ ଇଞ୍ଜା ବାରେ ମାହାପୁରୁ ଲକୁତାକି ଜୀଞ୍ଜୁନନାୟି ମାନେ, ^{୧୬} ଏ କାତା ଖେଞ୍ଜାନା ମିଙ୍ଗେତାକି ନା ପ୍ରାତାନାତା ମାହାପୁରୁଇଁ ଜହରା କିହିମାଇଁ । ^{୧୭} ମା ପ୍ରୁ ଜୀସୁ କ୍ରୀସ୍ତତି ମାହାପୁରୁ, ଗାଞ୍ଜୁରମିଗାଟି ଆବା, ଏଞ୍ଜାସି ମିଙ୍ଗେ ସୁଦୁଜୀଞ୍ଜୁଟି ହିୟାନେସି ଏ ଜୀଞ୍ଜୁ ମିଙ୍ଗେ ବୁଦି ହିୟାନେ, ଅଡେ ମାହାପୁରୁଇଁ ମୀ ତାଣା ତଞ୍ଜି କିୟାନେ, ଆତିହାସି ମୀରୁ ଏଞ୍ଜାଣାଇଁ ପୁଞ୍ଜେରି । ^{୧୮} ଏମାଟିଏ ମୀ ହିୟାଟି କାଣ୍‌କା ଦେପି ଆଡ଼ିସାରେ, ତାନୁ ହାଟାମାଞ୍ଜାନି ବାସୁ ଏନାୟି, ମାହାପୁରୁ ଲକୁତାଣା ତାନି ଅଦିକାରାଟି ଗାଞ୍ଜୁରମିଗାଟି ଦନ ଏନାୟି, ^{୧୯} ତାନି ଲକୁତାକି ତାନି ଆଞ୍ଜାମାନାୟି ହାରେକା କାଜା ବର ଅଡେ ନାମିମାନାତାୟି ମାରୁ, ତାନି ବାଡ଼ୁୟିତି କାମା କିନାତାୟି, ଇଞ୍ଜା ମାଙ୍ଗେତାକି ତାନି ବାଡ଼ୁୟି ଏତେକା କାଜାୟି ଇ ବାରେ ପୁଞ୍ଜାଲି ଆଡ଼ିଦେରି; ^{୨୦} ଏ ବାଡ଼ୁୟି କ୍ରୀସ୍ତ ତାଣା ତସାନା ଏଞ୍ଜାଣାଇଁ ହାଡାରି ତାଣାଟି ନିକହାନା ଲାକପୁରୁ ତାନି ଟିଠନି ଟଟତା କୁଟି କିହାମାନେସି । ^{୨୧} କ୍ରୀସ୍ତ ଲାକପୁରୁ ବାରେ ସାଲଞ୍ଜି କିନାସି,

କାଜାପାଣା, ବାଡ଼ମ୍ଭୁ, ମୁସ୍ତାଦାରିୟା ଲାକ ସାଲଝି କିନାସି, ଇ ଜୁଗୁତା ଅଡ଼େ ଏ ଜୁଗୁତା ଏଚେକା ଦରକା ଝେଙ୍ଗା ମାନୁ, ଏ ବାରେତି ମୁହେଁ ଏଝାଣି ପାଣା କାଜାୟି । ^{୨୨} ☆ମାହାପୁରୁ ବାରେ କ୍ରୀସ୍ତତି କତାୟାଁ ଡ଼ଇ ଇଚିତେସି, ଇଞ୍ଜା ଏଝାଣାଇଁ ବାରେତି କିହାଁ କାଜାସି କିହାନା କ୍ରୀସ୍ତାନା କୁଲମିକା ହେରପା ମାନେସି । ^{୨୩} ଏ କୁଲମିକା କ୍ରୀସ୍ତତି ଆଙ୍ଗା ଲେହେଁ, ଇଚିହଁ ଆମ୍ବାଆସି ବାରେ କାମାତି ବାରେ ତାଣା ପୂରା କିନେସି ।

୨

ହାକିଟି ଜୀଝୁ ପାଣନାୟି

^୧ ମୀ ଦହ ଅଡ଼େ ପାପୁ ତାକି ତଲି ଜୀଝୁତା ହାହାମାଚେରି, ^୨ ଇଚିହଁ ଏମିନି ଜୀଝୁ ନୀର୍ବି ଜିକେଏ କାତା ମାନଝି ଆଆଗାଟି ମୀରକା ତାଣା ଅଦିକାରା କିହାମାନେ, ଏ ଦାର୍ତତିତି ମନତଲେ ମୀରୁ ଜିକେଏ ତଲି କାଲା ଏ ଜିରୁତା ତାକିହଁ ଦହ କିହାନା ପାପୁତାକି ହାହାମାଚେରି । ^୩ ଏ କାତା ମାନଝି ଆଆଗାଟି ମୀରକା ତଲେ ମୀର ବାରେ ଏ ବେଲତା ମା ଆଙ୍ଗାତି ମାଣ୍ଡକି ତଲେ ନୀତାନା ଆଙ୍ଗା ଅଡ଼େ ମନତି କାମା କିହିମାଚାୟି, ଇଞ୍ଜା ଏଚକାତାରି ଲେହେଁ ମୀର ଜିକେଏ ମାହାପୁରୁ କପାତି ଲକୁ ମାଚାୟି ।

^୪ ସାମା ମାହାପୁରୁ ହାଚେରକା କାର୍ମା ମେହନାସି; ଏଝାସି ମାଙ୍ଗେ ହାଚେରକା ଜୀଝୁ ନଝୁତା ଜୀଝୁ ନୟାତେସି, ^୫ ଏଚେତା ମୀର ପାପୁ ତାକି ହାହା ମାଚାୟି, ଇଞ୍ଜା ମାଙ୍ଗେ କ୍ରୀସ୍ତ ଜୀସୁ ତଲେ ନିକହାତେସି, ଅଡ଼େ ମାହାପୁରୁତି କାର୍ମାଟି ମୀରୁ ଗେଲପି ଆହାମାଞ୍ଜେରି । ^୬ ଇଞ୍ଜା ତାନି ତଲେ ମାଙ୍ଗେ ହାକିଟି ନିକହାନା କ୍ରୀସ୍ତ ଜୀସୁ ତାଣା ଲାକପୁରୁ କୁଗି କିହାମାଞ୍ଜାନେସି । ^୭ କ୍ରୀସ୍ତ ଜୀସୁ ତାଣା ମାଙ୍ଗେତାକି ଜୀଝୁନହାନା ଝାହିମାନି ଜୁଗୁତା ତାନି କାର୍ମାତି ହାଚେରକା ଦନ ତସାଲି ମାହାପୁରୁ ଇଦାଆଁ କିତେସି । ^୮ ଏନାଆଁତାକି ଇଚିହଁ ମୀରୁ ନାମିତାକି ମାହାପୁରୁତି କାର୍ମାଟି ଗେଲପି ଆହାମାଞ୍ଜେରି; ଏଦି ମୀ ତାଣାଟି ଆହା ହିଲେଏ, ଏଦି ମାହାପୁରୁତି ଦାନା, ^୯ ଏଦି ମୀରୁ କାମା କିତାକି ଆଏ, ଏଦାଆଁତାକି ଆମ୍ବାଆସି ବତପଣ କିଆପେସି । ^{୧୦} ଇଚିହଁ ମୀର ତାନି

ତାଣାଟି ଗାଡ଼ି ଆହାମାନାୟି; ଆମିନି ନେହୁଁ କାମା କିଇଁ ଇଞ୍ଜୁଁ
ମାହାପୁରୁ ତଲିଏ କିହାଲି ତାକି ତିୟାରା କିହାମାତେସି ଏ ବାରେ
ମାନୁଝି ଆହାଲି କ୍ରୀସୁ ଜୀସୁ ତାଣାଟି ଗାଡ଼ି ଆହାମାନେ ।

କ୍ରୀସୁ ତାଣା ରଣ୍ଡିଏ ଆନାୟି

୧୧ ମୀରୁ ଏଚିବେଲା ତଲି ଆଙ୍ଗା ତଲେ ଜୀହୁଦିଆଆନା ମାତେରି
ଅଡ଼େ ଆଙ୍ଗାଟି ଅଣପୁତା କେୟୁତଲେ ତଲୁ ଦାପି ଆଡ଼ି ଲକୁ ତାଣାଟି
ତଲୁ ଦାପି ଆଆତାରି ଇଞ୍ଜୁଁ ଝେଙ୍ଗିମାତେରି । ୧୨ ଏଚିବେଲା ମୀରୁ
କ୍ରୀସୁ ତାଣାଟି ହେକ ମାତେରି, ମୀରୁ ଏଟକା ଦେସାତାତେରି ମାତେରି,
ଅଡ଼େ ମାହାପୁରୁଟି ଆଡ଼ିତି ଇସ୍ରାୟେଲ କୃତାତା ଆଣ୍ଡାହିଲାଆତେରି,
ମାହାପୁରୁ ତାନି ଲକୁତାକି କିହାମାନି ରାଜିମାନାତା ମୀ ଏନି ବାଗା
ହିଲାଆତେ, ମାହାପୁରୁ ଅଡ଼େ ବାସୁଁ ହିଲାଆ ଲକୁ ଲେହେଁ ଦାରତିତା
ବାସା କିହାମାତେରି । ୧୩ ନଟକଏ ମୀରୁ ହେକ ମାତେରି, ସାମା
ନୀଏଁ ମୀରୁ କ୍ରୀସୁ ଜୀସୁ ତାଣାଟି ତାନି ନେତେରି ତଲେ ତାଗେ
ଆହାମାଞ୍ଜେରି । ୧୪ ଏନାଆଁତାକି ଇଚିହୁଁ ଏଝାସି ମା ହିଡ଼ଡ଼ି, ଏଝାସି
ସାତୁ ଲେହେଁ ପାଡ଼ି କାତିନି କାତିତି ତିକହାନା ବାରେତି କାଲହା
ମାନେସି, ୧୫ *ଜୀହୁଦି ଲକୁତି ପାଣାପାଟୁ ହୁକୁମିତି ମେରାତି ତାନି
ଆଙ୍ଗାଟି ହେକ କିହାମାନେସି, ଏନିକଁ ଏଝାସି ହିଡ଼ଡ଼ି ହାହାନା
ଜୀହୁଦି ଅଡ଼େ ଜୀହୁଦିଆଆତି କୃତାତାରାଇଁ ତାନି ତାଣା ର ପୁଝନି
ଲକୁଲେହେଁ ଗାଡ଼ି କିନେସି । ୧୬ *ଅଡ଼େ କୁସତା ହାହାନା ଜୀହୁଦି
ଅଡ଼େ ଜୀହୁଦିଆଆତାରି ସାତୁତି ନାସା କିହାନା ଏଦାଣି ତଲେ
ରିଆରାଇଁ ରଣ୍ଡିଏ ଆଙ୍ଗା ଲେହେଁ ଗାଡ଼ିକିହାନା ମାହାପୁରୁ ତଲେ
ଆଣ୍ଡିକିୟାନେସି । ୧୭ ଅଡ଼େ ହେକ ମାତି ଜୀହୁଦିଆଆତି ଲକୁଣି ଅଡ଼େ
ତାନି ତାଗେ ମାନି ଜୀହୁଦି ଲକୁ ଇ ରିଆରି ତାଣା ଏଝାସି ଝାହାନା
ହିଡ଼ଡ଼ିତି ନେହୁଁ କାରୁ ଝେକହେସି; ୧୮ ଏନାଆଁତାକି ଇଚିହୁଁ
କ୍ରୀସୁତି ତାକି ବାରେ ଜୀହୁଦିୟାଁ ଅଡ଼େ ଜୀହୁଦିଆଆତି ଲକୁ ରଣ୍ଡିଏ
ସୁଦୁଜୀଝୁଟି ଲାକପୁରୁ ଆବା ତାଣା ହାଜାଲି ଜିରୁ ବେଟାଆହାମାନାୟି

୧୯ ଏଦାଆଁତାକି ମୀରୁ ଏଟ୍‌କା ଦେସାତାତେରି ଇ ଦେସାତାତେରି ଆଏ, ସାମା ମାହାପୁରୁ ଲକୁତଲେ ଆଣ୍ଡାନା ଏଞ୍ଜାରି ଦେସାତି ଲକୁ, ଅଡ଼େ ମାହାପୁରୁ ଇଲୁ କୁଟମିତେରି । ୨୦ ମୀରୁ ପାଣ୍ଡୁଞ୍ଜି ଆହାମାନାରି ଅଡ଼େ ମାହାପୁରୁ ଅଣ୍ଡପୁତି ବଲୁ ଝେହ୍‌ନାରି ଇଟାମାନି ପୁନାଦି ମୁହେଁ ଇଟ୍‌କି ଆହାମାଞ୍ଜେରି, କ୍ରୀସ୍ତ ଜୀସୁ ତାନୁଏ, ଏ କନତି ମୂଲୁ ଝାଲି । ୨୧ ଏଞ୍ଜାଣି ତାଣା ବାରେ ଇଲୁତି ବାରେ କାତିୟା ଦୂର୍ସାନା ପ୍ରବୁ ତାଣା ର ସୁଦୁ ଆଞ୍ଜାମାନି ମାହାପୁରୁ ଇଲୁ ଲେହେଁ ପାତାଆହିମାନେ । ୨୨ ଏଞ୍ଜାଣି ତାଣା ମୀରୁ ଜିକେଏ ମା ତଲେ ଆଣ୍ଡାନା ସୁଦୁଜୀଞ୍ଜୁଟି ମାହାପୁରୁ ବାସାଆନି ଇଲୁ ଲେହେଁ ଦସ୍‌ପି ଆହାମାଞ୍ଜେରି ।

୩

ଏଟ୍‌କା ଲକୁତାଣା ପାଞ୍ଜୁଲତି କାମା

୧ ଇଦାଆଁତାକି ମୀ ଲେହେଁତି ଜୀହୁଦିଆଆତି ଲକୁତାକି କ୍ରୀସ୍ତ ଜୀସୁ ତାକି ଦସ୍‌ପି ଆହାମାନି ପାଞ୍ଜୁଲତେଏ । ୨ ମିଙ୍ଗେତାକି ନାଙ୍ଗେ ହୀହାମାଞ୍ଜାନି ମାହାପୁରୁତି କାର୍ମାଟି ସେବାକିନି କାମାତି କାତା ମୀରୁ ଝେଞ୍ଜାମାଞ୍ଜେରି, ୩ ଅଡ଼େ ତରୁମାନି କାତା ମାହାପୁରୁ ତାନୁଏ ତସାନା ପୁଣ୍ଡି କିୟାତେସି, ଏନିକି ନାନୁ ତଲି ଏ ବାରେ କାତା ଇଚାଣି ରାଟାମାଞ୍ଜ; ୪ ମୀରୁ ଏଦାଆଁ ପଡ଼ଞ୍ଜି ଆହାମା କ୍ରୀସ୍ତ ତରୁମାନି କାତା ନାନୁ ଏନାଆଁ ତେଲ୍‌ହାମାଞ୍ଜ ଏଦାଆଁ ମୀରୁ ତେଲ୍‌ହାଲି ଆଡ଼ିଦେରି, ୫ ତଲି କାଲ୍‌ମାତା ମାଣ୍ଡସିୟା ତାଣା ତଞ୍ଜା ଆହାହିଲାଆତେ, ଏ ତରୁମାନାୟି ନୀଏଁ ସୁଦୁଜୀଞ୍ଜୁଟି ତାନି ସୁଦୁତି ପାଣ୍ଡୁଞ୍ଜି ଆହାମାନାରି ଅଡ଼େ ମାହାପୁରୁ ଅଣ୍ଡପୁତି ବଲୁ ଝେହ୍‌ନାରି ତାଣା ଏନିକି ତଞ୍ଜା ଆହାମାନେ, ୬ ଏ ତରୁମାନି କାତା ଇଦି ନେହ୍ କାରୁ ତାଣାଟି ଜୀହୁଦିୟା ମାହାପୁରୁତି ବର ବେଟାଆନି ଲେହେଁ, ଏଟ୍‌କା କୃତାତାରି ଜିକେଏ ବାରେଜାଣା ଆଣ୍ଡାନା ର ଆଙ୍ଗା ଲେହେଁ ଆହାମା କ୍ରୀସ୍ତ ଜୀସୁ ତାଣାଟି ମାହାପୁରୁ ଆଞ୍ଜାମାନାଣି ବାରେ ବେଟାଆନେରି ।

୭ ମାହାପୁରୁତି କାମା କିନି ବାଡ଼ୁରୁ ତଲେ ନାଙ୍ଗେ ଏମିନି କାର୍ମାଟି ଦାନା ହୀହାମାଞ୍ଜାନେସି ଏଦାଆଁତାକି ଏ ନେହ୍ କାରୁତି

ଝେକ୍‌ନାତେଏଁ ଆହାମାଲ୍ । ୮ ମାହାପୁରୁ ଲକ୍ଷ୍ମୀ ବିଦ୍ରାଢ଼ି ନାନୁ ବାରେଡ଼ି କିହାଁ ଉଣାତେଏଁ ମାଟି ଜିକେଏ ଏଟକା କୁଡ଼ାତି ଲକ୍ଷ୍ମୀତାଣା ଏଜିକିହାଲି ଆଡ଼ାଆଗାଟି କ୍ରୀସ୍ତତି କାର୍ମାତି ନେହଁ କାରୁ ଝେକ୍‌ହାଲି ମାହାପୁରୁ ପାରୁ ହୀହାମାଞ୍ଜାନେସି, ୯ ଅଡ଼େ ବାରେ ଗାଡ଼ିକିତି ମାହାପୁରୁ ତାଣା ତଲି କାଲ୍‌ଗିଏ ଡ଼ରୁମାନି କାତାତାକି ଏଞ୍ଜାଣି ଅଣ୍‌ପୁ ଏନାୟି ଏଦାଆଁ ଉଜେଡ଼ିତା ତସାଲି ତାକି ମାହାପୁରୁତି କାର୍ମା ମେଡ଼ା ଆହାମାଞ୍ଜାନେ, ୧୦ ଏନିକିହଁ ନାଏଁ କ୍ରୀସ୍ତାନା କୁଲମିତି କାମାଟି ଲାକପୁରୁତି ସାଲ୍‌ଝି କିନାରି ବାଡ଼ୁଲୁ ଗାଟି ମାହାପୁରୁତି ବୁଦି ନେହଁ କଁ ପୁଞ୍ଜାଲି ଆଡ଼ିନେରି, ୧୧ ମାହାପୁରୁ ତାନି କାଲ୍‌କାଲ୍‌ଗି ଅଣ୍‌ପୁ ଲେହେଁ ମା ପ୍ରବୁ କ୍ରୀସ୍ତ ଜୀସୁ ତାଣାଟି ବାରେ କିହାମାନେସି । ୧୨ ଏ ପ୍ରବୁ ତାଣା ନାମାମାନାକି ମାର ଏଞ୍ଜାଣି ତାଣା ସାସାଟି ଆଜାଆନା ମାହାପୁରୁ ତାଣା ହାଜାଲି ସାସା ବେଟାଆହାମାନାୟି । ୧୩ ଏଦାଆଁତାକି ନାନୁ ମିଙ୍ଗେ ବାଡ଼ିମାଲିମାଞ୍ଜାଲ୍, ମିଙ୍ଗେତାକି ନାନୁ ବେଟାଆହିମାନି ଦୁକୁ କସ୍ତ ତାକି ସାସା ପିହ୍‌ଆଦୁ, ସାତେଏ ଏଡ଼ି ମୀ ଗାଞ୍ଜୁରମି ତାକି ଆହାମାନେ ।

କ୍ରୀସ୍ତତି ଜୀଞ୍ଜୁନନାୟି

୧୪ ଏଦାଆଁତାକି ଆମିନି ଆବା ତାଣାଟି ଲାକପୁରୁ ଅଡ଼େ ଦାରତିତି ବାରେ କୁଟମି, ତାନି କୁଡ଼ାତି ଦରୁ ବେଟାଆହାମାନେ, ୧୫ ଏ ମାହାପୁରୁ ଆବା ନକିତା ମେଣ୍ଡାକୁତାନା ପ୍ରାତାନା କିହିମାଲ୍ । ୧୬ ଏନିକଁ ଏଞ୍ଜାସି ତାନି ଗାଞ୍ଜୁରମିଗାଟି ଦନ ତାନି ସୁଦୁଜୀଞ୍ଜୁ ତଲେ ମିଙ୍ଗେ ମୀ ଅଣ୍‌ପୁତା ତାରି ମାଣ୍‌ସି ଆହାଲି ବାଡ଼ୁଲୁ ହିୟାନେସି, ୧୭ ମୀ ନାମୁତଲେ କ୍ରୀସ୍ତ ମୀ ହିୟାତା ବାସା କିନେସି, ଏନିକଁ ମୀ ଜୀଞ୍ଜୁ ନଞ୍ଜୁତା ପୁନାଦି ଅଡ଼େ ଆଟ୍‌ଞ୍ଜା ତଲେ ତାରିଆହାନା ଏଜିକିହାଲି ଆଡ଼ାଆଗାଟି କ୍ରୀସ୍ତତି ଜୀଞ୍ଜୁ ନଞ୍ଜୁ, ୧୮ ଏଦାଆଁ ପୁଞ୍ଜୁ ଇଞ୍ଜା ବାରେ ମାହାପୁରୁ ଲକ୍ଷ୍ମୀତଲେ ଏମ୍ବାତି ଅସାରା ଅଡ଼େ ଲାମ୍ବା ପାଡ଼ଣି ଅଡ଼େ ଗାଡ଼ୁଲୁତି ପୁଞ୍ଜାଲି ବାଡ଼ୁଲୁ ବେଟାଆଦି । ୧୯ ହାଅ ମୀରୁ ଏନିକଁ କ୍ରୀସ୍ତତି ଜୀଞ୍ଜୁ ନନାଣି ପୁଞ୍ଜେରି ଆତିହଁ ଜିକେଏ ଏଦାଆଁ ନେହଁ କଁ ପୁଞ୍ଜାଲି ଆଏ, ଅଡ଼େ ଏଲେକିହଁ ମାହାପୁରୁତି ଗୁଣୁତଲେ ପାତାଆଦୁ ।

୨୦ ଆମିନି ମାହାପୁରୁ ମା ହିୟାତା କାମା କିହିମାନି ତାନି ବାଡ଼ୁଲୁ ତଲେ ମାର ରାହ୍‌ନାଣି ଅଡ଼େ ଅଣ୍‌ପିନାଣି କିହାଁ ହାରେକା ଆଗାଡ଼ା

ହିୟାଲି ଆଡ଼ାନେସି, ^{୨୧} କୁଲମିଟି ଅଡ଼େ କ୍ରୀସ୍ତ ଜୀସୁ ତାଣାଟି ଏ ମାହାପୁରୁତି ଗାଝୁରମି କାଲାକାଲାତାକି ମାଣ୍ଡେ । ଆଡ଼େନ ।

୪

ରଣ୍ଡିଏ ଆଙ୍ଗା

^୧ ପ୍ରବୁତି ସେବାତାକି ନାନୁ କାୟିଦିତା ମାଇଁ, ମିଙ୍ଗେ ବାତିମାଲିମାଞ୍ଜାଇଁ, ଏନିକି ନୀତାବାଡ଼କାଲି ତାକି ମାହାପୁରୁ ମିଙ୍ଗେ ହାଟ୍ତାମାଞ୍ଜାନେସି, ଏଲେତି ମାଣ୍ଡକି ତଲେ ମାଞ୍ଜୁ । ^୨ ଇତିହିଁ ବାରେଲେହେଁତି ଉଣା ଗାଟାତେରି, ସୁଦୁ ସୁଞ୍ଜାଲା, ହାରେକା ଅରହିନାତେରି ଅଡ଼େ ଜୀଝୁନହାଁନା ରଅତେରି ରଅଣାଇଁ ଅରହିନାତେରି ଆଦୁ; ^୩ ମୀରୁ ବାରେଜାଣା ତେରି ହିଡ଼ଡ଼ିତି ଡ଼ରିତଲେ ଦସ୍ପି ଆହାନା ସୁଦୁଜୀଝୁ ବାଡ଼ୁଡ଼ିତି ରଣ୍ଡିଏ ଲେହେଁ ଆହାଲିତାକି ଜାଡ଼ନୁ ଆଦୁ । ^୪ ଆଙ୍ଗା ରଣ୍ଡିଏ, ସୁଦୁଜୀଝୁ ଜିକେଏ ରଣ୍ଡିଏ, ଏନିକି ମୀରୁ ମୀ ହାଟ୍ତାମାନି ରଣ୍ଡିଏ ବାସୁଁ ତଲେ ହାଟ୍ତକି ଆହାମାଞ୍ଜେରି; ^୫ ପ୍ରବୁ ରଅସିଏ, ନାମୁ ରଣ୍ଡିଏ ଅଡ଼େ ବାପ୍ପିସ୍ତ* ଜିକେଏ ରଣ୍ଡିଏ, ^୬ ବାରେ ମାଣ୍ଡସିୟାଁତି ରଣ୍ଡିଏ ମାହାପୁରୁ ଅଡ଼େ ତାଞ୍ଜି; ଏଞ୍ଜାସି ବାରେତି ମୁହେଁ, ବାରେତି ବିତ୍ରା ଇଞ୍ଜା ବାରେତି ହିୟାଁତା ମାନେସି ।

^୭ ସାମା କ୍ରୀସ୍ତତି ଦାନା ଏତେକା ବେଟାଆନାୟି ମାନେ ଏତେକା ମାଙ୍ଗେ ବାରେଜାଣା ତାକି ମାହାପୁରୁତି କାର୍ମାମେହନାୟି ହୀପ୍ତିକି ଆହାମାଞ୍ଜାନେ । ^୮ ଦାମୁଁ ସାସ୍ତେରିତା ରାସ୍ତିକି ଆହାମାନେ, “ଏଞ୍ଜାସି ଲାକ ହାଜାନା, ହାରେକା ଦସ୍ପି ଆହାମାନାରାଇଁ ତାନିତଲେ ଅଡ଼େସି;

ଅଡ଼େ ମାଣ୍ଡସିୟାଁକି ଏଟ୍ଟକା ଏଟ୍ଟକାତି ବର ହୀତେସି ।”

^୯ “ଏଞ୍ଜାସି ଲାକ ହାରେସି” ଇତିସାରେ ଏନାୟି ? ଏଲେଇତିସାରେ ମୁଲୁଏ ଏଞ୍ଜାସି ଦାର୍ଡିତି ଡ଼ଇ ପାତେକା ରେଟା ଝାହାମାରେସି । ^{୧୦} ଆମ୍ବାଆସି ଡ଼ଇପୁରୁ ଝାହାମାରେସି, ବାରେ ଦାର୍ଡିଇଁ ତାନୁ ମାଞ୍ଜାନା ବାରେ ପୁରା କିହାଲିତାକି ଏଞ୍ଜାସି ଅଡ଼େ ଝେଣ୍ଡେ ଲାକପୁରୁ ହାରେସି, ^{୧୧} ଏଞ୍ଜାସି ଲକୁତାକି ହାରେକା ଦାନା ହୀତେସି; ଆମ୍ବାଆରାଇଁ ପାଣ୍ଡୁଞ୍ଜି

☆ ୪:୨ ୪:୨ କଲସି ୩:୧୨,୧୩

* ୪:୫ ୪:୫ମୁଞ୍ଜିନାୟି

ଆଡ଼ାରି ଆହାଲି, ଆମ୍ବାଆରାଇଁ ମାହାପୁରୁ ଅଣ୍ଠପୁତି ବଲୁ ଝେକ୍‌ନାରି ଆହାଲି, ଆମ୍ବାଆରାଇଁ ନେହଁ କାବୁ ଝେକ୍‌ନାରି ଆହାଲି, ଅଡ଼େ ଏଚର ଜାଣାଇଁ କୁଲମି ଜାଡ଼ନୁ କିନାରି ଅଡ଼େ ଜାପ୍‌ନାରି ଆହାଲି ଦାନା ହୀହାମାନେସି, ^{୧୨} ଏନିକ୍‌ ମାହାପୁରୁ ଲକୁତି ସେବା କାମାତାକି ତୀରି ଆହାଲି ଆଡ଼ିନେ ଇଞ୍ଜା କ୍ରୀସ୍ତତି ଆଜ୍ଞା ପାତାଆହାଲି ଆଡ଼ିନେ ^{୧୩} ଏନିକ୍‌ ମାର ବାରେଜାଣା ନାମୁତା ଅଡ଼େ ମାହାପୁରୁତି ମୀରୁଏଣା କାତାତି ବୁଦିତା ରଣ୍ଡିଏ ଆହାଲି ଆଡ଼ିନାୟି, ଇଚିହଁ କ୍ରୀସ୍ତ ଲେହେଁ ଆହାନା ପାତାଆଡ଼ି ଲକୁ ଲେହେଁ ଆନାୟି, ^{୧୪} ଗାଲି ଖାନାଟି ଅଡ଼େ ଏମ୍‌ ଉଣ୍ଡାତା ଦାଢ଼ିମାନି କକାରି ପଦାୟି ଲେହେଁ ମାର ଇତାଲା ଆତାଲା ଆଆପ । ଏଚକା ଲକୁଣି ଜିରୁ ବାଣି କିହିମାନି ନାଡ଼ିକିନି ଅଣ୍ଠପୁତି ଜାପ୍‌ନି ତାଣା ମାର ତରଗାଆପ । ^{୧୫} ସାମା ସାତାତି ଆସାନା ତାୟି ଚୁଲେହେଁତି କ୍ରୀସ୍ତ ଏଞ୍ଜାଣି ତାକି ବାରେ ଜୀଝୁ ନଝୁତା ପାତାଆନ । ^{୧୬} ଏଞ୍ଜାଣି ତାଣାଟି ବାରେ ଆଜ୍ଞା ବାରେ ହାନ୍ତୁଲିକା ସାୟେମି ତଲେ ଅଡ଼େ ବାରେ ଆଜ୍ଞାତି କାମା କିନି ବାଡ଼ୁମ୍‌ ତଲେ ଦୁରଞ୍ଜି ଆହାନା ଜୀଝୁ ନଝୁତା ତାମି ନେହେଁତାକି ଜାହାରାଇଁ ପାଡ଼ି କିହିମାନୁ ।

କ୍ରୀସ୍ତ ତାଣା ପୁଝନି ଜୀଝୁ

^{୧୭} ପ୍ରବୁ ଦରୁତଲେ, ନାନୁ ମିଙ୍ଗେ ଜାଗ୍ରାତା କିହଁ ଝେସିମାଞ୍ଜାଇଁ, ନାମାଆତାରି ଏନିକ୍‌ ତାମି ମନତା ଉଜେଏତି ଅଣ୍ଠପୁ ତଲେ ନୀଡ଼ିନେରି ମୀରୁ ଏଲେକ୍‌ ନୀତାଆଦୁ, ^{୧୮} ଏଞ୍ଜାରି ତାମି ତାଣା ମାନି ମୁକୁଁ ତାକି ଜାହା ଜାହାରା ମନ ଆଟ୍‌ଞ୍ଜା ମାନାକି ଏଞ୍ଜାରି ମାହାପୁରୁ ହୀହାମାନି ଜୀଝୁତି ବୁଦି ଆନ୍ଦେରି ଆହାମାନେ, ଅଡ଼େ ମାହାପୁରୁ ତାଣାଟି ଏଚକା ଆହାମାନେରି; ^{୧୯} ଏଞ୍ଜାରି ଆଟ୍‌ଞ୍ଜା ଆହାନା ଦନ ଜୁପକା ଆହାନା ବାରେ ଲାଗେଏତି କାମା କିହାଲି ଜାହାରାଇଁ ହେର୍‌ପା କତାମାନେରି । ^{୨୦} ସାମା ମୀରୁ କ୍ରୀସ୍ତାଇଁ ଏଲେକିହଁ ଜାପାହିଲଅତେରି । ^{୨୧} ମୀରୁ ତାନି କାତା ସାତାତଲେ ଝେଞ୍ଜାମାଞ୍ଜେରି, ଅଡ଼େ ଜୀସୁ ତାଣା ମାନି ସାତାତି ତାନିତଲେ ମାଞ୍ଜାନା ଜାପାମାଞ୍ଜେରି, ^{୨୨} ଇଚିହଁ, ମୀରୁ ମୀ ନଚେଏତି ମାଣ୍ଡକିତା ନାଡ଼ିକିନି ରାହଁତା ହାରେ ହାରେକା ଲାଗେଏ ଆହିମାଚେ । ^{୨୩} ମୀ

ମନତା ପୁଃନି ଗୁଣୁ ଆହାନା । ୨୪ ✠ଏମିନି ପୁଃନି ଗୁଣୁ ମାହାପୁରୁତି
 ଖାଣା ତଲେ ଦାମ୍ନୁ ଅଡ଼େ ସାତାତି ସୁଦୁତା ଗାଡ଼ି ଆହାମାଞ୍ଜେରି, ଏଦାଆଁ
 ପରହାଲି ଜାପାମାଞ୍ଜେରି । ୨୫ ଈଦାଆଁତାକି ମିଚିତି ପିସାନା ମୀରୁ
 ବାରେଜାଣା ତେରି ନାମିତି ତାୟିୟାଁ ତଲେ ସାତା କାତା ଝେସ୍ପି
 ଆଦୁ, ଇଚିହ୍ମୁ ମାର ରଣ୍ଡିଏ ଆଙ୍ଗାତାୟି । ୨୬ କାରବି ଆଦୁ, ସାମା
 ପାପୁ କିଆଦୁ; ଝେଡ଼ା ହାଲାଆ ନଡ଼କଏ କାରବି ପିହ୍ମୁ; ୨୭ ଅଡ଼େ
 ସୟତାନକି ଟାୟୁ ହୀଆଦୁ । ୨୮ ସରୁ ଅଡ଼େ ସରୁ କିଆପେସି, ଇଚିହ୍ମୁ
 ହିଲାଆ ଗାଟାରାକି ହୀହାଲିତାକି ଏନିକିହ୍ମୁ ତାନି ତାଣା ଏନାୟି
 ଡ଼ୟିନେ, ଈଦାଆଁତାକି ତାନି କେୟୁତଲେ ନେହ୍ମୁ କାମା କିହାନା
 କସ୍ତ କିପେସି । ୨୯ ମୀ ଗୁଡ଼ିତି ଏନି ଲାଗେଏତି କାତା ହୁଆପେ, ମୀ
 ଲଡ଼ାମାନି ଲେହେଁ ନେହ୍ମୁ କାତା ହପେ ଏନିକ୍ମୁ ଏଡ଼ି ଝେନାରାକି
 ନେହାୟି ଆନେ । ୩୦ ମାହାପୁରୁତି ସୁଦୁଜୀଝୁ ତଲେ ମିଙ୍ଗେ ଗେଲ୍ପିନି
 ଦିନାତାକି ବୁରୁ ମୁଦା କିଝି ଆହାମାଞ୍ଜେରି ଏଦାଣି ଦୁକୁ ହୀଆଦୁ ।
 ୩୧ ବାରେଲେହେଁତି କୁରୁ ଅଣ୍ପୁ, କାରବି, କପା, ଗଡ଼ହା ଅଡ଼େ ନିନ୍ଦା,
 ଇଞ୍ଜା ବାରେଲେହେଁତି ଅପାଆଗାଟାୟି ମୀ ତାଣାଟି ହେକ ଆପେ
 । ୩୨ ✠ଅଡ଼େ, ରଅତେରି ରଅଣାକ୍ କାମା ଅଣ୍ପାଦୁ, ହିଡ଼ି ହିୟା,
 ଅଡ଼େ ମାହାପୁରୁ କ୍ରୀସ୍ତ ତାଣା ମିଙ୍ଗେ ଏନିକିହ୍ମୁ ଦହ୍ ପିସ୍ତାନେସି,
 ଏଲେକିହ୍ମୁ ରଅତେରି ରଅଣି ଦହ୍ ପିହ୍ମୁ ।



ଉଜେଡ଼ିତା ନୀତିନାୟି

୧ ମୀରୁ ମାହାପୁରୁତି ଜୀଝୁତି ମୀରକା ମାସ୍‌କାତେରି ଆହାମାନାକି,
 ମାହାପୁରୁ ଲେହେଁ ଆଦୁ; ୨ କ୍ରୀସ୍ତ ଏନିକ୍ମୁ ମିଙ୍ଗେ ଜୀଝୁ ନୟାତେସି,
 ଅଡ଼େ ମା ତାକି ମାହାପୁରୁ ତାକି ଗାନ୍ଦାଗାଟି ନେହ୍ମୁ ପୂଜାଲେହେଁ
 ଜାହାରାକ୍ ହେରପାକଡ଼ିତେସି, ମୀ ଜୀଝୁତା ଜିକେଏ ଏଲେକିହ୍ମୁ
 ଜୀଝୁ ନଝିଆହାନା ନୀତାଦୁ ।

୩ ସାମା ଦାରିକାମା, ବାରେଲେହେଁତି ଲାଗେଏତି କାମା କି ଜୁପ୍‌କା,
 ଈ ବାରେ ମୀ ତାଣା ଟାୟୁ ବେଟା ଆଆପେ; ଏଡ଼ି ମାହାପୁରୁ ଲକୁତାଣା

✠ ୪:୨୪ ୪:୨୪ କଲସି ୩:୧୦ ✠ ୪:୩୨ ୪:୩୨ କଲସି ୩:୧୩

ନେହାୟି ଆଏ; ୪ ଅଡ଼େ ଏନାୟି ଆଆଗାଟାୟି, ଅଜାଆତି କାତା, ଲାଗେଏତି କାତା, ଲକୁଣି ଲାଜା କିହାଁ କାକ୍ନାୟି ମୀ ବିତ୍ରା ତଞ୍ଜା ଆଆପେ, ସାମା ବାରେ କାତାତାକି ମାହାପୁରୁଇଁ ଜହରା କିଦୁ । ୫ ଇଚିହିଁ ମୀରୁ ସାତେଏ ପୁଞ୍ଜାମାଞ୍ଜେରି, ଏମିନି ଦାରି କାମାକିନାସି କି ଲାଗେଏତି କାମାକିନାସି କି ହାରେକା ଜୁପୁକା ଆନାସି ଏଞ୍ଜାସି ପେଣ୍ଟକା ବମାୟାତି ପୂଜା କିନାସି, ଏଲେତି ଲକୁକି କ୍ରୀସ୍ତ ଅଡ଼େ ମାହାପୁରୁତି ରାଜିତା ଅଦିକାରା ହିଲେଏ ।

୬ ଆମ୍ବାଆସି ମିଙ୍ଗେ ଉଜେଏତି କାତା ଝେସାନା ନାଡ଼ି କିୟାଆପେସି, ଏନାଆଁତାକି ଇଚିହିଁ ଇ ବାରେ ଲାଗେଏତି କାମାତାକି କାତା ମାନଞ୍ଜି ଆଆଗାଟି ମୀରକା ମୁହେଁ ମାହାପୁରୁତି କାରୁବି ଝାନେ । ୭ ଇଦାଆଁତାକି, ମୀରୁ ଏଞ୍ଜାରିତଲେ ଏଞ୍ଜାରିଲେହେଁ ଆଆଦୁ; ୮ ଏନାଆଁତାକି ଇଚିହିଁ ମୀରୁ ତଲି ଆନ୍ଦେରି ଲେହେଁ ମାତେରି, ସାମା ନୀଏଁ ପ୍ରବୁତି ଲକୁ ଆତାକି ଉଜେଡ଼ି ଲେହେଁ ଆହାମାଞ୍ଜେରି; ଉଜେଡ଼ିତି ମୀରକା ଲେହେଁ ତାକାଦୁ, ୯ ଇଚିହିଁ ବାରେଲେହେଁତି ନେହାୟି, ଦାମ୍ବୁଗାଟାୟି ଅଡ଼େ ସାତା ଉଜେଡ଼ିତି ପାଡ଼େୟି ଲେହେଁ, ୧୦ ପ୍ରବୁକି ଏନାୟି ନେହେଁ, ଏଲେତି କାମା କିହାଲି ଜାପାଦୁ; ୧୧ ଲକୁ ଆନ୍ଦେରିତା ଆମିନି ବାରେ ଲାଗେଏତି କାମା କିହିମାନେରି, ଏ ବାରେ କାମାତା ଆଣ୍ଡାଆଦୁ, ଇଞ୍ଜା ଏଞ୍ଜାରି ବାରେ କାମାତି ଦହ ତହୁଦୁ । ୧୨ ଏନାଆଁତାକି ଇଚିହିଁ ଏଞ୍ଜାରି ଏନାଆଁ ଡ଼ଗୁନା କିନେରି, ଏ ବାରେ କାତା ଝେହ୍ନାୟି ଜିକେଏ ଲାଜାତି କାତା, ୧୩ ସାମା ବାରେ ଲାଗେଏତି କାମା ଉଜେଡ଼ି ତଲେ ତସ୍ପିଆନେ, ଏନାୟି ବାରେ ତଞ୍ଜାଆନେ ଏଦି ବାରେ ଉଜେଡ଼ି । ୧୪ ଏଦାଆଁତାକି ରାୟକି ଆହାମାନେ,

“ଇଦା କିହାମାନାତେରି, ନିଙ୍ଗାଦୁ,
ହାଡ଼ାରି ତାଣାଟି ନିଙ୍ଗାଦୁ,
ଅଡ଼େ କ୍ରୀସ୍ତ ମିଙ୍ଗେ ଉଜେଡ଼ି ହିୟାନେସି ।”

୧୫ ଇଚିହିଁ ବୁଦି ହିଲାଆ ଗାଟାରିଲେହେଁ ଆଆନା ବୁଦି ମାନାରି ଲେହେଁ ମୀ ନୀତିନାଣି ତାକି ଜାଗ୍ରାତା ଆଦୁ, ବୁଦି ହିଲାଆଗାଟାତେରି ଲେହେଁ ଆଆନା ବୁଦି ଗାଟାତେରି ଲେହେଁ ଆଦୁ । ୧୬ ☆ ପାଗାତି ନେହିଁ କିଁ ଲେମ୍ବାଦୁ, ଏନାଆଁତାକି ଇଚିହିଁ କାଲା ଲାଗେଏତାୟି ।

୧୭ ଏଦାଆଁତାକି, ବୁଦି ହିଲାଆ ଗାଟାରିଲେହେଁ ଆଆନା ପ୍ରବୁତି ଅଣ୍ଟୁ ଏନାୟି ଏଦାଆଁ ତେଲ୍‌ହାଦୁ ।

୧୮ ଅଡ଼େ କାଡ଼ ଗୁସାନା ହଡ଼ାଆଦୁ, ଏନାଆଁତାକି ଇଚିହିଁ ଏଢ଼ି ମିଜେ ନାସା କିୟାନ୍ତୁ; ସାମା ପାରୁ, ସୁଦୁଜୀଝୁଟି ଜହରା କିହିଁ ରଅତେରି ରଅଣାଇଁ ବାର୍ଣ୍ଣ ହାଦୁ, ୧୯ ଅଡ଼େ ମୀ ହିୟାଁ ମାହାପୁରୁ ତାକି ସୁଦୁଜୀଝୁ ତଲେ ଜହରା ପାରୁ ପାଡ଼ାଦୁ । ୨୦ ବାରେରେଲା ବାରେ କାତାତାକି ପ୍ରବୁ ଜୀସୁ କ୍ରୀସ୍ତତି ଦରୁତଲେ ଆବା ମାହାପୁରୁଇଁ ଜହରା କିଦୁ ।

ଡକ୍ରି ଅଡ଼େ ଡକ୍ରି

୨୧ ଅଡ଼େ କ୍ରୀସ୍ତଇଁ ଆଜାନା ରଅତେରି ରଅଣାଇଁ ମାନି କିଦୁ ।

୨୨ ଏ ଆୟସିକା ମୀରୁ ଏନିକିଁ କ୍ରୀସ୍ତଇଁ ମାନି କିହିମାନି ଲେହେଁ ମୀରୁ ମୀ ଡକ୍ରିୟାଣି ମାନି କିଦୁ, ୨୩ ଇଚିହିଁ କ୍ରୀସ୍ତ ଏନିକିଁ କୁଲମିତି ତାୟିଁ ଚୁଲେହେଁ, ଡକ୍ରି ଜିକେଏ ଏଲେକିଁ ଡକ୍ରିନି ତାୟିଁ ଚୁଲେହେଁତାସି, ଇଞ୍ଜାଁ କ୍ରୀସ୍ତ ତାନି ଆଜା ଲେହେଁତି କୁଲମିତି ଗେଲ୍‌ପିନେସି । ୨୪ ହାଅ, କୁଲମି ଏନିକିହିଁ କ୍ରୀସ୍ତଇଁ ମାନି କିନେ, ଏଲେକିହିଁ ଡକ୍ରିସିକା ଜିକେଏ ବାରେ କାତାତା ତାନି ଡକ୍ରିୟାଣି ମାନି କିପୁ ।

୨୫ ଏ ଡକ୍ରିୟାତେରି, କ୍ରୀସ୍ତ ଏନିକିଁ କୁଲମିତି ଜୀଝୁ ନଡ଼େସି, ମୀରୁ ଜିକେଏ ଏଲେକିହିଁ ମୀ ଡକ୍ରିସିକାଣି ଜୀଝୁନଦୁ; ଇଚିହିଁ ଏଝାସି ଏଡାନାକି ତାନି ଜୀଝୁ ହାଡେସି, ୨୬ ଏଝାସି କୁଲମିତି ବଲ୍ଲୁ ଅଡ଼େ ଏୟୁତଲେ ନରୁହାନା ମାହାପୁରୁ ତାକି ସୁଦୁ କିହାନା ହେର୍ପିତେସି, ୨୭ ଏନିକିଁ କୁଲମି ଗାହାଁଗାରି, ଅଡ଼େ ଦହ୍ ହିଲାଆଗାଟାୟି ଆହାନା ସୁଦୁ ଗାଟାୟି ଆନେ, ଅଡ଼େ ଏଲେକିହିଁ ଏ ଗାଝୁରମି ତଲେ ମାହାପୁରୁ ତାନି ତାଣା ଅନେସି । ୨୮ ଏଲେକିହିଁ ଡକ୍ରିୟାଁ ଜିକେଏ ତାନି ଡକ୍ରିସିକାଣି ଜାହାରା ଆଜା ଲେହେଁ ଜୀଝୁନନାୟି ମାନେ, ଆମ୍ବାଆସି ଜାହାରା ଡକ୍ରିନି ଜୀଝୁ ନନେସି, ଏଝାସି ଜାହାରାଇଁ ଜୀଝୁ ନନେସି; ୨୯ ଆମ୍ବାଆସି ଜିକେଏ ଜାହାରା

☆ ୫:୧୯ ୫:୧୯ କଲସି ୩:୧୬,୧୭ ☆ ୫:୨୨ ୫:୨୨ କଲସି ୩:୧୮; ଏପିତ ୩:୧ ☆ ୫:୨୫ ୫:୨୫ କଲସି ୩:୧୯; ଏପିତ ୩:୭

ଆଜ୍ଞାତି ନାନୁ ଅପଥ୍ୟ ଇଞ୍ଜିଁ ଇନଅସି, ସାମା ତାନି ଆଜ୍ଞା ତାକି ତିନେସି ଉନେସି ଅଡ଼େ ଜାଡ଼ନ୍ତୁ ଇଚିନେସି, କ୍ରୀସ୍ତୁ ଜିକେଏ କୁଲମିତାକି ଏଲେକିହ୍ କିନେସି, ୩୦ ଏନାଆଁତାକି ଇଚିହ୍ ମାର୍ତ୍ତ ତାନି ଆଜ୍ଞାତି ଆଜ୍ଞା ଉଡ଼େଲି ତାୟି । ୩୧ ଦାର୍ମପତିତା ରାସ୍ତକି ଆହାମାନେ, “ଇଦାଣି ତାକି ଆବାଟି ତାଲି ତାଞ୍ଜିଇଁ ପିସାନା ଜାହାରା ତକ୍ତି ତାଣା ଆଣ୍ଟିନେସି, ଅଡ଼େ ଏ ରିଆରି ରଣ୍ଟିଏ ଆଜ୍ଞା ଆନେରି ।” ୩୨ ଇ ଦାର୍ମ ସାସ୍ତେରିତା ରାସ୍ତକି ଆହାମାନି ତାଣା ହାରେକା ଡ଼ଗୁମାନି କାତା ମାନେ, ସାମା ନାନୁ କ୍ରୀସ୍ତୁ ଅଡ଼େ କୁଲମିତି କାତା ଖେସିମାଞ୍ଜାଇଁ । ୩୩ ଏନାୟି ଆପେ, ମୀରୁ ବାରେଜାଣା ଜାହାରା ତକ୍ତିଇଁ ଜାହାରା ଜୀଞ୍ଜୁ ଲେହେଁ ଜୀଞ୍ଜୁନଦୁ, ଇଞ୍ଜା ତକ୍ତି ଜିକେଏ ଜାହାରା ତକ୍ତିଇଁ ମାନି କିନାୟିମାନେ ।



ତାଲି ତାଞ୍ଜି ଅଡ଼େ କକାରି ପଢ଼ାଁ

୧ *କକାରି ପଢ଼ାୟାଁତେରି, ପ୍ରବୁତି ତାକି ମୀ ତାଲି ତାଞ୍ଜି କାତା ମାନୁଞ୍ଜି ଆଦୁ; ଇଚିହ୍ ଏଡ଼ି ମିଙ୍ଗେ ତାକି ନେହାୟି । ୨ “ମୀ ତାଲି ତାଞ୍ଜିଇଁ ମାନି କିଦୁ, ଇଦି ମାହାପୁରୁ ଆଞ୍ଜାମାନି ର କାଜା ହୁକୁମି, ୩ ଏନିକିହ୍ ମିଙ୍ଗେ ନେହ୍ ଆନେ, ଇଞ୍ଜା ମୀରୁ ଦାର୍ତତିତା ହାରେକା ଦିନା ନୀତିଦେରି ।”

୪ *ତାଲି ତାଞ୍ଜି ତେରି, ମୀ କକାରି ପଢ଼ାଣି କପା କିଆଦୁ, ସାମା ଏଞ୍ଜାରଇଁ ପ୍ରବୁତି କାତା ଜାପ୍ତୁ ଅଡ଼େ ସେଦନା ତଲେ ପହିକିଦୁ ।

ହଲିୟା ଅଡ଼େ ସାଞ୍ଜୁକାରି

୫ *ଏ ହଲିୟାଙ୍ଗାତେରି, ମୀରୁ ଏନିକ୍ କ୍ରୀସ୍ତୁଇଁ ମାନୁଞ୍ଜି ଆହିମାଞ୍ଜେରି, ଏଲେକିହ୍ ଆଜି ଅଡ଼େ ତୀରଗିହ୍ ତୀରି ହିୟାଁ ତଲେ ମୀ ଦାର୍ତତିତା ସାଞ୍ଜୁକାରିୟାଁ କାତା ଆହ୍‌ଦୁ; ୬ ମାଣ୍ଟିଇଁ ରାହାଁ କିନିଲେହେଁ ତାମି ନକିତା ଏଦାଆଁ କିଆଦୁ, ସାମା କ୍ରୀସ୍ତୁତି ହଲିୟାଁ ଲେହେଁ ହିୟାଁ ତଲେ ମାହାପୁରୁତି ଅଣ୍ଟୁ ତୀରିକିଦୁ । ୭ ଖାରଇଁ ମାଣ୍ଟିୟାଁତି ସେବା କିହିମାନମି ଇଞ୍ଜିଁ ଅଣ୍ଟପାନା ପ୍ରବୁତି ସେବା କିନିଲେହେଁ ରାହାଁତଲେ ଏଦାଆଁ କିଦୁ, ୮ ଇଦାଆଁ ପୁଞ୍ଜାନା, ଏଞ୍ଜାସି

କଡ଼ିତ ହଲେଏସି ଆଠେସି କି ହଲେଏସି ଆଆପେସି ପ୍ରବୁ ବାରେ ଲକ୍ଷୁକି ଏଞ୍ଜାରି ନେହୁଁ କାମାତାକି ଏଞ୍ଜାରି ଏନାଆଁ ବେଟାଆନାୟି ମାନେ ଏଦାଆଁ ହୀନେସି ।

୯ ଏସି ସାଞ୍ଜୁକାରିୟାଁତେରି, ହଲିୟାଙ୍ଗାଣି ଲାଗେଏ ତଲେ ଲେମ୍ବାଆଦୁ କି ଏଞ୍ଜାରାଙ୍ଗ ଆଜିକିଆଦୁ; ମୀରୁ ଅଢେ ମୀ ହଲିୟାଙ୍ଗା ବାରେଜାଣା ତେରି ଲାକପୁରୁତି ପ୍ରବୁତି ହଲିୟାଙ୍ଗାତେରି; ଏଞ୍ଜାସି ବାରେଜାଣାତି ପାରଡ଼ା ବାଟି କିଆନା ବିଚାରା କିନେସି ।

ମାହାପୁରୁତି ଜୁଜୁକିନି ଜୁତି

୧୦ ତାୟୁତି କାତା ଇଦି, ପ୍ରବୁ ତାଣାଟି ବାଡ଼ୟୁ ବେଟାଆହାନା ଏଞ୍ଜାଣି ବାଡ଼ୟୁଟି ବାଡ଼ୟୁ ଗାଟାତେରି ଆଦୁ । ୧୧ ମୀରୁ ଏନିକିଁ ସୟତାନତି ବାରେ ପଲ୍ଲଆ କାମାଟି ଜୀଣା ଆୟାଲି ଆଡ଼ିଦେରି, ଏଦାଆଁତାକି ମାହାପୁରୁ ହୀହାମାଞ୍ଜାନି ଜୁଜୁକିନି ଜୁତି ବାରେ ତୁରଦୁ । ୧୨ ଇତିହୁଁ ମା ଜୁଜୁ ଦାରତିତାରି କପାଟି ଆଏ, ସାମା ଲାକପୁରୁତି କାଜାପାଣା କପାଟି, ସାଲୁଝି କିନାରି କପାଟି ଇ ଆନ୍ଦେରିତି ପାଣାଗାଟାରି କପାଟି ଅଢେ ହାଗୁ ପାକାତି ପଲ୍ଲଆ ଜୀଞ୍ଜୁୟାଁ କପାଟି ଜୁଜୁ କିହିମାନାୟି । ୧୩ ଏଦାଆଁତାକି ନୀଏଁ ମାହାପୁରୁ ହୀହାମାଞ୍ଜାନି ଜୁଜୁକିନି ଜୁତିତି ତୁରଦୁ, ଆତିହୁଁ ଲାଗେଏତି ବେଲାତା ମୀରୁ ସାତୁ ନକିତା ନିଚାଲି ଆଡ଼ିଦେରି ଇଞ୍ଜା ରାନି ପାତେକା ଜୁଜୁକିହୁଁ ତୀରିଆହାଁ ଡୟାଲି ଆଡ଼ିଦେରି ।

୧୪ ଇତିହୁଁ, ସାତାତି ଜାଟି ଗେଡେଲିତା ରୁପାକତାହାଁ, ଦାମ୍ବୁତି ବକ ପାଟା ଲେହେଁ ତୁରଦୁ, ୧୫ ହିଡ଼ି ହୀନି ନେହୁଁ କାବୁତାକି ଅଜିକିଝି ଆହାମାନି ସେପୁୟାଁ କତାଣା ତୁରହାନା ତାଟା ଆହାମାଞ୍ଜୁ; ୧୬ ବାରେବେଲା ନାମୁତି ଆଡୁ ପାଟା ଆସାମାଞ୍ଜୁ, ଏଦାଣି ତଲେ ମୀରୁ ସୟତାନତି ବାରେ ଡୀଞ୍ଜିମାନି ଆପକାତି ହିରୁ ବାରେ ତୁପହାଲି ଆଡ଼ିଦେରି । ୧୭ ଅଢେ, ଗେଲ୍ପିନି ଟପେରି ତାୟୁଁ ତୁା ତୁରଦୁ ଅଢେ ସୁଜୁଜୀଞ୍ଜୁତି ହିୟାତି ମାହାପୁରୁତି ବଲୁତି କାଣ୍ଡା ଆହୁଦୁ; ୧୮ ବାରେଲେହେତି ପ୍ରାତାନା ଅଢେ ବାଡ଼ିମାଲିନି ତାଣା ବାରେବେଲା ସୁଜୁଜୀଞ୍ଜୁ ସାୟେମି ତଲେ ପ୍ରାତାନା କିଦୁ, ଇଞ୍ଜା ବାରେ ମାହାପୁରୁ

ଲକ୍ଷ୍ମୀତାକି କାପୁ କାଚାନା ପ୍ରାଚାନା କିହେମାଞ୍ଜୁ । ୧୯ ଅଡ଼େ, ନାଞ୍ଜେତାକି ଜିକେଏ ପ୍ରାଚାନା କିଦୁ, ଏନିକି ନେହୁ କାବୁତାକି ଦୁଡୁ ସମାନା ନାନୁ, ନାଞ୍ଜେ ଏ ଡ଼ଗୁମାନାଣି ପୁଣ୍ଡି କିହାଲି ସାସାତଲେ ବଲୁ ଝେସାଲି ମାହାପୁରୁ ନା ଗୁଡିତା ନେହୁ କାବୁ ହିୟାନେସି । ୨୦ ଅଡ଼େ ନାନୁ ଏନିକି ଏମ୍ବାତି ସାତା କାତା ସାସାତଲେ ଝେସାଲି ଆଡ଼ିଇଁ ।

ଜହରା ଝେସାହାଁ ଆକୁତି ରାପ୍ନାୟି

୨୧ ✠ନା କାତା, ଇତିହୁ ନାନୁ ଏନିକି ମାଇଁ, ଇଦାଆଁ ମୀରୁ ଜିକେଏ ଏନିକି ପୁଞ୍ଜାଲି ଆଡ଼ିଦେରି, ଇଦାଣି ତାକି ନା ଜୀଞ୍ଜୁତି ତାୟି ଅଡ଼େ କ୍ରୀସ୍ତତି କାମାତା ନାମୁଡି ହଲେଏସି ତୁକିକ, ନା ବାରେ କାତା ଏଞ୍ଜାସି ଝେସାନେସି; ୨୨ ଏ ବାରେ କାତା ଝେସାଲି ନାନୁ ଏଞ୍ଜାଣାଇଁ ମୀ ତାଣା ପାଣ୍ଡାତେଏଁ, ଏନିକି ମୀରୁ ମା ବାରେ କାତା ପୁଞ୍ଜାଲି ଆଡ଼ିଦେରି ଅଡ଼େ ମୀ ହିୟାଁ ଏଞ୍ଜାଣି ତାଣାଟି ରାହାଁ ଆନେ ।

୨୩ ଆବା ମାହାପୁରୁ ଅଡ଼େ ପ୍ରୁ ଜୀସୁ କ୍ରୀସ୍ତଇଁ ନାମିତି ତାୟି ତାଞ୍ଜିସ୍ତାକି ହିଡ଼ଡ଼ି, ଜୀଞ୍ଜୁନନାୟି ଅଡ଼େ ନାମୁ ହିୟାପେସି । ୨୪ ଏଚେକା ଲକ୍ଷ୍ମୀ ମା ପ୍ରୁ ଜୀସୁ କ୍ରୀସ୍ତଇଁ କାଲେଏ ଜୀଞ୍ଜୁ ନନେରି, ମାହାପୁରୁଡି କାମାମେହନାୟି ଏ ବାରେତାକି ଆପେ ।

ପୁସ୍ତକ ଫେରା

The New Testament in the Kuvi language of India: ପୁସ୍ତକ ଫେରା (Bible)

copyright © 2020 The Word for the World International

Language: କୁଠି (Kuvi)

Contributor: The Word for the World International

ପୁସ୍ତକ ଫେରା, କୁଠି ପୁସ୍ତକ ଫେରା, 2020

The New Testament in Kuvi Language

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-12

PDF generated using Haiola and XeLaTeX on 21 Feb 2024 from source files dated 13 Apr 2023

081337bf-dba3-542b-bc85-280acfb14d33